

691.

3395

MANIFESTE

DES PERONNOIS,

AVX FIDELLES
FRANCOIS.

M. DC. XVI.

THE NEWBERRY
LIBRARY

CONFERENCE, OV ASSEMBLEE

*Pastoralle, faicte au village de Gentelles, le
premier iour d'Octobre an present mil six cens
& seize, entre les plus anciens Bergers de la con-
tree, sçauoir, N. D. F. & V.*

Cae

F

39

326

N. **C**ompagnons, il y a quinze iours, ou
trois sepmaines qu'estans tous repo-
sants, au bout de ce village, durant la pran-
gelle de nos troupeaux, ie vous monstray la
coppie d'un discours, trouué en l'Eglise no-
stre Dame de Laon, qui faict cognoistre à
peu près tout ce qui s'est passé ces iours der-
niers en la ville de Peronne. Ie vous dis des-
lors, qu'il estoit fort a propos, veoir neces-
saire, que chacun vist ce discours, tant pour
la descharge de Monsieur de Longueuille,
& des habitans dudit Peronne, que pour
seruir d'aduertissement à tous bons & fidels
François. Vostre responce ne fut autre, si-
nõ que ledit sieur de Longueuille, & lesdits
habitans trauailleroient infailliblement à
cest affaire, pour retarder le cours des men-
songes, calomnies, & iniures, qu'on pour-
roit vomir cõtre eux. C'est pourquoy voyãt
maintenant, que par vne negligence vraye-
ment grossiere, & du tout inexcusable, les-

1616m

dicts habitās ont mesprisé ce qui faisoit totalement pour leur descharge & iustification, i'ay pris la hardiesse de vous assembler icy, pour vous en auertir, & vous monstrier la declaration nouvellement faicte par la Maiesté, sur l'arrest ou emprisonnement de Monsieur le Prince (ou l'on voit que sadite Maiesté, mal informee & circonuenue de mauuais & faux discours, se plainct du saissement de la ville de Peronne, comme de chose entreprise, & tramee de long temps, quoy qu'il paroisse du contraire par ledict discours.) A fin que d'un commun consentement nous aduisions ce que pouons faire, pour tesmoigner a nostre chere patrie, & particulierement aux Peronnois, nos bonnes volonteiz & droictes intentions, vous me direz donc (s'il vous plaist) ce qui est a faire maintenant, pour supplier à la negligence susdites, & leuer les mauuaises impressions, qu'on peut auoir doné à plusieurs qui indiscretement, & sans aucune cognoissance de cause, blasment & condamnent lesdits Peronnois.

V. Sage & fidel compaignon, ie vous feray responce pour nous tous, & en peu de mots, qu'il n'y auoit point apparence de preueoir

ceste grande, & blasmable negligence, lors
 que de vostre grace, auons veu ce discours.
 On voit biē, que Monsieur de Longueuille
 s'est attendu ausdits habitans, & eux a luy,
 & ainfi tout est demeuré en l'estat qu'il est, à
 l'interest commun des bons François: mais
 puis que le Prouerbe du pays nous apprend
qu'il vaut mieux tard, que iamais, nous som-
 mes d'auis pour combatre le mensonge, &
 soustenir la verité de faire faire diligemmēt
 par nostre Clerc, & Magister, qui escript as-
 sez bien, deux douzaines de coppies dudit
 discours, pour les semer, & espartre ça & là.
 Nous asseurans qu'aussi tost que l'vne des-
 dictes coppies, sera tombee es mains de
 quelque bon François, qu'il en fera faire
 plusieurs autres copies, par quelque Impri-
 meur qui escript beaucoup mieux que nostre
 Magister. Voila tout ce que pouuons faire
 a nostre aduis, pour tesmoigner ausdits Pe-
 ronnois, & autres bons François, nos bon-
 nes volonte, & sincerés affections.

N. Chers & bien aymez compagnons, ie
 loue, & approuue vos aduis, & d'aurāt plus,
 que ie vois & entens assez souuent plusieurs
 mauuais François, blasmer ce qui s'est passé
 audict Peronne, & le vouloir faire seruir de

pretexte, pour remettre encore vn coup, ce
 pauvre & affligé Royaume de France, en
 toutes sortes de cōfution & delordre, quoy
 qu'il ne s'y soit rien faiât contre le seruice
 de sa Maiesté: ains pour conseruer la ville
 sous son obeyssance, & authorité, & pour
 empescher l'execution des desleins sinistres
 & mauuais amplement touchez audict dis-
 cours, nous faisant cognoistre que les estrā-
 gers ne cesseront iamais, tant qu'ils seront
 receus parmy nous, de procurer nostre to-
 talle ruine. Il faut donc promptement &
 sans delay, faire trauailler ausdictes coppies
 par nostre Magister, afin que les enuoyons
 ça, & la, a l'effect susdict. C'est ce me sem-
 ble tout ce que pouuons faire en nostre pe-
 titesse, nos houlettes, & panneretieres, ne sont
 capables de plus grande assistance. Dieu par
 sa saincte grace, aye pitié de nous, & vueille
 bien tost nous donner vn repos asseuré,
 bon & fertile pasturage à nos troupeaux, à
 Dieu chers compagnons, iusqu'à la premi-
 ere veue.

Sic pastores loquebatur, ad inuicem

DISCOVRS VERITABLE, DE CE
*qui s'est passé en la ville de Peronne, au mois
 d'Aoust dernier, an present 1616.*

Peronne aux François.

Ecce in pace, amaritudo mea, amarissima.

Cant. Ezech.

IL est notoire en la Prouince de Picardie, qu'ë Iuin 1594. le Roy Henry le Grand, de tres-heureuse, & louable memoire, desirant gratifier les habitâs de Perõne leur conceda plusieurs beaux priuileges : Entre autre, que nul delà en auant ne seroit fait leur Gouverneur, qu'il ne fut Gentil-homme du pays & bon Catholique.

Messire Michel d'estournel, qui estoit lors gouverneur, desirât quelque tēps apres quitter son gouuernemēt, le bailla à messire Loys Dognyes, Côte de Chaulnes, apres la mort duquel [aduenue au mois de l'auier 1604] Sa Maieſté memoratifue de ce qu'il luy auoit plea acorder ausdits habitâs, leur dōna pour Gouverneur, haut & puisſât Seigneur Messire Charles de Crequy, Prince de Poix, Seigneur du Pays, comme les susnōmez : qui auroit tenu ledict Gouuernement, iusqu'au deceds de l'adite maieſté qui fut en may 1610.

Nonobstant le Priuilege susdit, conforme
à la loy generale, qui n'admet les estrangers
aux Gouuernemēs des villes frōtieres, ledit
Seigneur de Crequy fut tellemēt sollicité en
Iuin. dudit an 1610. qu'il se trouua contraint
de transporter ledit Gouuernement au sieur
de Conchines, Italien, a present Marechal
de France, Chose qui affliga fort lesdits ha-
bitans, preiugeans bien deslors, qu'il leur en
arriueroit plusieurs malheurs & infortunes.

Ledit sieur de Cōchines n'eut point si tost
pris possession de ce beau & importāt gou-
uernemēt, qu'il eut volōté de faire faire vne
Citadelle, pour son assurece, & pour mieux
effectuer les desseins grāds & hardis, que dès
lors il commençoit a tramer en soy mesme:
Ce que neātmoins il n'auroit fait apertemēt
reconoistre, que le iour del'Ascēsiō dernier
qu'il auroit fait venir audit Peronne, l'inge-
nieux de l'Archiduc espagnol de natiō, pour
tirer le plan de ladite Citadelle [cōme il fit]
au giād deuil & mescontētemēt desdits ha-
bitās, & de tous ceux des lieux circōuoisins.

Se seroit chose, d'vne longue, & ennuieuse
entresuite, s'il falloit particulièrement rap-
porter les insolences, vergongnes & fasche-
ries, qu'ōt receu lesdicts habitās, de ceux qui
ont cōmandé audit Perōne, & qui y ont esté

en garnison sous la charge & autorité dudit sieur Cōchines, il suffira de dire & remarquer en ce lieu, que le sieur de Fauols Lieutenant, & Tadei sō enseigne, auroiēt tellemēt abusé du pouuoir de leur maistre, que le second iour d'Aoust 1614. ils se seroient effrōttement transportez en l'auditoire Royal dudit Peronne, les plaids tenans accōpagnez de plusieurs soldats, pour battre & outrager vn Huissier, estant au service desdits plaids, ayans tous les poignards nuds en la main, avec mil blasphemes en la bouche : Action tres temeraire, qui pensa porter les Perōnois à vne grāde sedition. La Cour en fut dès ledit temps suffisamment aduertie, par bons procès verbaux dressez en assemblée generale, ou Presidoit Monsieur de Ramerangles, Lieutenant Particulier. Neantmoins n'en a esté fait aucun chastiment, iusqu'à present pour certaines causes, raisons, & considerations, que chacū ne peut sçauoir.

Pour ne faire donc ce discours trop long : Ains toucher seullemēt ce qui a causé les remuemens & esmotions dernieres audit Peronne, & donné subiect a Monsieur de Longueville, gouverneur general de ladite Province de Picardie, de s'y trāsporter le dimanche 14. Aoust dernier, faut scauoir & noter que

que deux mois auparauât lesdits sieurs de Fauols, Tadei, & de Rames Baqueuille (qui auoit en garnison audit Perōne, vne cōpagnie de deux cēs hommes de pied, leuez sās Commission du Roy : mais par le seul commandemēt dudit sieur de Conchines) faisoient en tous endroits, de grādes & audacieuses menaces, au preiudice, & desaduantage desdits habitās, disās que dās peu de iours, il y auroit mil hommes, & plus en garnison audit Peronne : que lors ils seroient maistres absoluts : qu'ils gouverneroiēt à baguettes, lesdits habitās : qu'ils leur tailleroient des croupieres, feroient bonnes fricassees de leurs oreilles : en feroient pendre vingt deux, qu'ils auoient par memoire : disposeroiēt librement, & a volonte de leurs fēmes, filles & biēs, bref qu'ils feroient si bien que monsieur le Marechal leur maistre, demeureroit seigneur souuerain & absolut dudit Peronne : Et que si lesdits habitans estaiēt si temeraires, que d'apporter quelque empeschement à l'execution de ce qu'ils auoient volonte de faire, qu'ils estoient bien resolus de ruiner la ville avec les canons, & feuz d'artifices, qu'ils auoient au Chasteau.

Les Maire Escheuins, & habitās dudit Peronne espouuentez de ces menaces, iugēt estre tres-necessaire d'auoir recours au Roy, & supplier sa Majesté de remedier promptemēt aux maux, & malheurs sūldits : toutes fois comme ils estoient sur le point de ce faire, ayās sceu que ledit sieur de Cō-

chines, estoit prest de partir pour aller en Normādie, ils trouuerent à propos de deputer vers luy, estās lors en son Chasteau de l'Esigny, maistre Ieā Gonnet, Conseiller du Roy, & son Aduocat audit Peronne, comme Lieutenāt du Maieur de ladite ville, pour luy faire offre du seruice de tous lesdits habitans, & luy faire entendre les menaces susdites, afin d'en empescher les effects, & estre cause d'un plus doux & humain traitement, laquelle deputation auroit esté faicte le vingt cinq ielme Iuillet dernier.

Durant le voyage dudit Gonnet, plusieurs Gētils-hommes estās de la suite, & aux gaiges dudit sieur de Conchines, avec plusieurs soldats, entrēt secretemēt, & file a file, tant dans ladite ville, que dans lediēt Chasteau, par l'industrie, & conduite desdicts de Fauols, & de Rames Bacqueuille. Ce qui auroit grandement esmeu, & allarme tous lesdits Peronnois.

Ledit sieur Duc de Longueuille [qui estoit lors en la ville d'Abbeuille) ayāt esté aduerti, comme ces Gentils-hommes & soldats, entroiēt secretemēt audit Peronne, & comme promptemēt on y alloit mettre vn grād nombre de gens de guerre, sans aucunes lettres patentes du Roy, ny attache de luy sur icelles, il en auroit aduerti lesdits Maire & Escheuins, par ces lettres, dattees du 7. dudiēt mois d'Aoust, portant defences tres expresses de recevoir aucune nouuele garnison audit Perōne,

sans lesdites patētes & attache. Lesquelles lettres communiqees au sieur de Plainuille, estant lors audit peronne, ausdits de Fauols & de Rames, & assemblée generale ayāt esté faicte au corps de la-dicte ville, le mardy neufiesme dudit mois veille de Monsieur S. Laurens, il fut conclud & arresté qu'on ne receuroit aucune garnison, sans lesdites patentes & attache: & qu'il estoit necessaire de deputer quelqu'un pour aller trouuer sa Maiesté, & l'aduertir de tout ce que dessus.

Ledit iour neufiesme Aoust, sur les huit heures du soir, ledit Gonnet retourna de son voyage de l'Esigny, & passant pardeuant ledit Chasteau de Peronne, fut prié d'entrer dedās, ou il trouua lesdits sieurs de plainuille, Fauols, Rames & plusieurs autres, qui tesmoignoēt estre fort mal contēs, de la resolution prise en l'assēblee susdite, & disoient auoir volonte & commandement de monsieur le Marechal leur maistre, de ne laisser entrer ledict sieur duc de Longueuille audit peronne. A quoy ayāt esté respondu par ledit Gonnet, qu'il trouuoit fort raisonnable la susdite resolution: & y auoir fort peu d'apparece de pouuoir empescher ledict sieur de Longueuille, d'ētrer audit peronne quād il luy plairoit, attendu l'Edict de pacification fait a Loudun, n'estoit qu'il y eut lettres patentes de la dicte Maiesté, a ces fins: il sortist dudit Chasteau, ayans prins congé des sieurs susnommez, le lendemain mercredy, iour de Monsieur S.

Laurès, sur les huit heures du matin, l'Edict susdit fait à Loudun, ayant esté publié audit Peronne, par le cōmandemēt de monsieur le Procureur General, (chose qui n'auoit en core esté faicte, au moyen de la retention des paquets enuoyez lōg temps auparauant par ledit sieur Procureur General) lesdits sieurs de Plainville, rauols, & de Rames, s'estās trāsportez dudit Chasteau, sur le marché dudit Peronne, & parlans a maistre Jacques Desmerliers, Majeur audit Gonnet, Aduocat du Roy, & autres Escheuins, en la presence d'ũ grād nombre d'habitans, vserent de ces propres mots, ayans les mains sur leurs espees, par la mort Dieu, nous sommes icy tous, pour exēcuter la volōté de monsieur le Marechal nostre maistre, qui ne veut en aucune facon recognoistre Monsieur de Longueuille, vous n'avez que faire de vous amuser à l'Edict qui vient d'estre publié, ny au contenu du trente cinqiesme article d'iceluy, d'autāt qu'il a esté fait par force, & lors qu'on tenoit au Roy le cousteau sur la gorge: pourquoy sa Maiesté n'entend y satisfaire aucunement, comme elle fera assez cognoistre auant peu de iours.

Les Maire & Escheuins, ayans entēdu ces paroles, repliquerent, parlans par la bouche dudit Gonnet, qu'il y auoit apparēce que la Maiesté n'estoit mal contētē du contenu en l'Edict susdict, n'ayās fait apparoir de volōté contraire, depuis la verification, & publication d'iceluy, & qu'ils se

trouuoient tous en extreme peine, & inquietude, pour ne pouuoir ensemblemēt accomplir ce que desiroient leurs Gouverneurs General, & Particulier: & que tout ce qu'ils pouuoient faire parmi ceste contētion de leurs chefs, & superieurs, estoit d'auoir recours à la Maiesté, comme ils esperoiet faire promptement: mais ceste replique, ou respōse n'estant agreable aux sieurs susnommez, fut par eux respōdu en ces termes, par la mort dieu nous ne sommes pas icy, pour entendre vostre babil & caquet: mais bien pour mourir s'il en est besoin, à la moindre resistance qu'on fera, à l'exécution de la volonté de mon sieur le Marechal nostre maistre, & tēnez pour assuré qu'à la premiere occasiō vous voirez les effectz correspondre à nos paroles.

Les Peronnois de plus en plus intimidez par tels discours & menaces precedentes, qui ne leur donnoiet qu'une assurance certaine de mil malheurs & incōmoditez, deputer vers la Maiesté, maistre Pierre de Haussi, & melchisedec le Vasseur Escheuins, pour l'aduertir du commandement susdit à eux fait par ledit sieur de Longueuille, & de l'empeschemēt que donnoit ledit sieur de Cōehines, à la recognoissance d'iceluy en ladiēte qualité de Gouverneur General de la Prouince, afin d'apprendre pleinement la volonté de sadite Maiesté, & se conformer suivant icelle.

Mais auparauant que faire partir lesdits deputez fut aduisé dans la Chambre de la ville, qu'il estoit

à propos d'aller trouuer lesdits sieurs de Plainville, Fauols, & de Rames, pour leur représenter encore vn coup, la conséquence de ce dont ils'agissoit, les supplier de proceder doucemēt en toutes leurs actions, & apprendre d'eux, s'ils demeueroiēt en mesme volonté & resolution qu'ils auoiēt au matin: pourquoy faire furēt choisis ledit Gonnet Aduocat du Roy, maistres Claude Aubé, Conseiller, & sieu pour sa Maiesté, Pierre martin procureur, & Notaire Royal, & Claude Vaillât bourgeois, tous Escheuins, lesquels estās paruenus assez proche de la porte dudit Chasteau, avec trois Sergens de ladite ville, qui les suiuoient, seroit ledit sieur de Fauols sorti accompagné de huit ou dix soldars, qui ayant entendu ledit Gonnet portant la parole, auroit dit qu'inutilement ils estoient là venus, d'autāt que luy & lesdits sieurs de Plainville & de Rames, auoient bonne souuenance de ce qu'ils auoient dit au matin: qu'ils n'auoient autre volonté que de mourir librement, pour effectuer les commandemens de Monsieur le Marechal leur maistre: que l'Edit susdit, fait a Loudū, & la qualité dudit sieur de Lōgueuille ne les pouuoit empescher en vn mot, qu'ils auoiēt tous bonne commission de leurdit maistre, & que la teste de luy Fauols, estoit suffisante pour respondre de toutes leurs actions. Laquelle response entendue, & ayant esté ledit sieur de Fauols supplié & interpellé de communiquer sa commission, si aucune

vallable il auoit avec offres de se conformer entièrement à la volonté de sadite Maieſté, ſi elle paroifſoit par ladite pretendue cōmiſſion, dont il ſeroit moqué & mis a rire, partirent auſſi toſt leſdits le Vaſſeur, & de Hauſſi deputez, avec lettres adreſſantes a ſadite Maieſté, & avec charge expreſſe de voir Mōſieur le Prince de Condé, Meſſieurs le Garde des Seaux, de Villeroy, & autres Seigneurs du Conſeil, pour les aduertir de tout ce que deſſus, & les ſupplier de contribuer pour le ſoulagement des habitans, tout ce qui ſeroit de leur pouuoir, & d'eſtre cauſe que leſdicts deputez fuſſent promptement expediez.

Ce meſme iour dixieſme dudit mois d'auouſt, ſur les neut heures du ſoir, & les portes de la ville eſtās ia fermees, vn nommé de Taſſart, ſieur de Belloy, parlant audict ſieur de Fauols & autres, diſt qu'il ne failloit point tant ſ'empescher des chiens, & fouts habitans, & que ſi on luy vouloit donner quarante ou cinquante mouſquetaires qu'il leur couperoit les oreilles, leur marcheroit ſur le ventre, & rēdroit monſieur le Mareſchal, maiſtre abſolut de ladite ville. Ce qui fut aprouué par l'enſeigne dudit ſieur de Rames, nommé Cuzac, & par vne Damoifelle du pays, qui dirent que ledit ſieur de Belloy parloit tort bien, & qu'il failloit neceſſairement ranger ces marauts d'habitās qui ſoubs pretexte de l'Edict de Pacification, vouloient oppoſer aux volontez de mōſieur le Ma-

reſchal leur maiftre, qu'il eſtoit temps ou iamais, que les ſoldats euſſēt le pouuoir de diſpoſer a leur plaifir des Bourgeoises & filles Peronnoises: bref qu'il failloit piller la ville, & la ruiner totalement.

Le leudy vnziēſme dudit mois, ledict ſieur de Plainuille, ſortant de ladite ville de Peronne, diſt parlant audict ſieur de Fauols, qu'il ſeroit biē toſt de retour, avec ſa troupe, & qu'il failloit cependāt neceſſairement aduiſer a ſ'aſſeurer de huit ou dix habitans, qui portoient les autres a ſ'oppoſer aux deſſeins de monſieur le Mareſchal leur maiftre. Ce qu'eſtant rapportē ausdits Maire & Eſcheuins leur fit croire, qu'il y auoit de grāds & pernitiēux deſſeins, contre ladiſte ville, & que les ſieurs ſuſ-nommez auoient vne mauuaiſe intētion, ne parlans aucunement du Roy, ny de ſon ſeruiſe: ains ſeulement de celui de leur maiftre. Les paroles ſuſdits affligerent fort tous leſdits habitans, & ce d'autant plus que ceux de la noble & ancienne maiſon d'Eſtourmel, predeceſſeurs dudit ſieur de Plainuille, n'ont iamais butē qu'au repos, ſoulagement & conſeruation de ladiſte ville, & des habitans d'icelles.

Le meſme iour, ayant eſtē recogneu manifeſtement, que ledit ſieur de Fauols continuoit de faire entrer file à file Gentils-hommes & ſoldats, fut arreſtē & reſolu en aſſemblee generale, de ne laiſſer entrer perſonne dans ladiſte ville, iuſqu'au retour deſdits de Hauſſi, & le Vaſſeur deputez.

Le

Le vendredy 12. dudit mois des quatre heures du matin, lesdits Maire & Escheuins, qui auoient eu aduis que mōsieur le Cheualier de Conchines desiroit venir à Peronne, depescherent vers luy, & par diuers chemins, Charles Bruhier, & Vincēt Varet, Archers du Lieutenant de Courte robe, pour luy donner aduis de la resolution susdite & le supplier tres-hūblemēt de differer sō voyage de deux ou trois iours seulement, & iusqu'au retour desdits deputez, qui aporteroient nouuelles certaines de la volōté de sa Maiesté, qui seroit aussi tost exactemēt suiuite, & executee par lesdits habitans: Mais ledit sieur Cheuallier, n'ayāt tenu aucun chemin certain & ordinaire, depuis la sortie de la Citadele d'Amiēs, n'auroit peu estre trouuē, ny r'encontré par lesdits Varet, & Bruhier.

Le sieur de Fauols tesmoignant de plus en plus sa mauuaise intention, mande ce mesme iour, & faict venir en grāde diligence, vn nōmé la Croix, Canonier ordinaire, & quatre autres Canoniers des frontieres d'Artois, pour accommoder en diligence, tous les Canons estans dans lediēt Chasteau. Ce qu'estāt paruenū à la cognoissance des habitans, estans en garde aux portes de ladite ville, l'entree en fut refusee ausdits Canoniers. Dequoy ledit sieur de Fauols s'offensa tellemēt, que s'adressant audit Desmerliers maieur, & quelques particuliers habitans, il vsa de plusieurs menaces & blasphemēs, & fut si insolent, que de leur ten-

dre la main sur la face, & hauffer son baston pour les traper. Ce que tout le peuple supporta avec vne admirable modestie, & se retira doucement, quoy qu'il veit les magistrats ainsi mesprîez, & foulez aux pieds,

Ledit iour de Vêdredy, deux heures de réleuee, l'alarme ionnant au Beffroy de ladite ville, du costé de la porte de Paris: Les habitans si transporterent avec leur armes, pour sçauoir que c'estoit, & ayans appris que les sieurs de Môtauben, Brûnillé, Belloy & autres Caualliers de la suite ordinaire dudit sieur de Conehines s'estoient presentez à la porte pour entrer en ladite ville, ce qu'on leur auoit refusé, suyuant la resolution susdite, tous lesdits habitans se retirent chez eux. Ce faict fut en mesme instant, ledit sieur de Fauols supplié de ne trouuer mauvais ce refus, & la continuation d'iceluy, iusqu'au retour desdits deputez, laquelle priere & requeste il reiecta avec toute sorte de mespris, vlant tousiours de ses blaphemes & menaces accoustumees, appellant lesdits habitans cocfredouilles.

Durant ceste alarme, ledit sieur de Rames, ayât pris les armes, au lieu d'aller en son quartier, mit sa compagnie en bataille, sur la contre escarpe des fossez dudit Chasteau, ou il demeura iusques a tant que tous lesdits habitans furent retirez chez eux. Auquel lieu estant, il dict hautement & par plusieurs fois, qu'il faillloit necessairement s'assu-

rer desdits habitās, & les desarmer tous, afin qu'ils ne peussent cy après s'opposer aux desseins & volontez de monseigneur le Marechal leur maistre.

Le mesme iour l'alarme sona encore du mesme costé, sur les sept heures du soir. Pourquoy lesdits habitans ayans repris leurs armes, se transporterent de rechef a ladite porte de Paris, ou le sieur de Fauols arriua fort hastiuemēt, qui sortist hors du faulxbourg, pour aller au deuant d'une troupe de Caualliers: entre lesquels on recognu ledit sieur Cheualier de Conchines, le Vicōte de Brunetel, Montobert, & autres, & cōme lesdits sieurs Cheualier & Fauols parloient ensemble, ledict sieur Vicomte disoit aux habitans, qui estoient sur les rempars dudit faulxbourg, vous faites biē tous les marauts, si iamais nous entrōs en la ville nous couperons les oreilles a tous les habitans, & puis les leur baillerons a garder, n'est que trouuions bon, d'en faire des fricassees, & grillades.

Toutes ces menaces & paroles insolentes, offēcerent & intimiderēt tout ensemble, ceux qui les auoient entendus. Toutesfois chacun des habitās fut fort modeste, & ne s'esloigna en facon du monde de son deuoir, & ne fut fait par eux, autre chose que supplication tres-humble audict sieur de Fauols, de vouloir rentrer seul en la ville, & audict sieur Cheualier de se vouloir retirer avec sa troupe, pour ne contreuenir à la resolution susdite, iusqu'a tant qu'on eut receu nouuelles de sa

Maieſté. Ce que ledit ſieur de Fauols ne voulut faire, diſant qu'il ne r'entreroit qu'avec ledit ſieur Cheualier & ſadiſte troupe. Toutesfois voyant que leſdits habitans demeuroient ferme en leur reſolution, & qu'ils auoient faiſt fermer la porte dudit fauxbourg, il ſe mit ſeul dans vn baſteau, & ainſi entra en la ville.

Comme de l'abondâce du cœur, la bouche parle ordinairement plus qu'elle ne doit, ledit ſieur de Fauols rentrant en la ville, avec ledit Deſmerliers maieur, Maïſtre Louys Vatin Aduocat, & Capitaine de ladite ville, ſuiuie d'un grand nombre d'habitans, vſa de ces propres termes, mort Dieu, ie vois bien comme vous faiſtes les impudens & temeraires: on vous rangera de telle forte que ſeruirés d'exemple aux autres, voicy vne iournée qui vous couſtera bien cher, & a vos enfans, ie ſcay bien ce que i'ay a faire de ma part. Ainſi que ledit ſieur de Fauols, acheuoit ce que deſſus, on vint dōner aduis que le ſieur de Rames, avec toute ſa compagnie, quittant ſa garniſon, ſ'eſtoit ſaiſi & emparé du Chateau, qu'il y faiſoit charger les Canōs, diſoit qu'il alloit preſentemēt mettre la ville au feu, & au ſang à force de canonnades, & feux d'artifice, pour teſmoigner le fidel ſeruiſſe qu'il auoit voué à monſieur le Mareſchal ſon maïſtre.

C'eſt aduis reçu, tout le peuple en faiſt plainte audit ſieur de Fauols, on le ſupplie d'euoyer vi-

tement vers ledit sieur de Rames, luy faire deffenses de n'attenter aucune chose cōtre le seruice de sa Maesté, & conseruation de la ville, lous son obeyssance: mais voyant qu'il mesprisoit tout ce qu'on luy disoit, & continuoit les menaces, chacun cōmença cōfusement a l'importuner de ce faire. Et iugeans bien tous les habitâs que le plus prompt remede qu'on peut trouuer pour empescher les effects des menaces susdits, & de la iuennesse dudit sieur de Rames, aagé de 21. à 22. ans seulement, estoit de prier ledit sieur de Fauols, de demeurer dans la ville, & ne rétreraudit Chasteau. Cela fut ainsi fait par lesdits Desmerliers, & Vatin, avec tout respect & modestie: Ausquels fut aussi tost accordé ce qu'ils desiroient, & a mesme instant se transporta ledit sieur de Fauols, en la maison dudit Desmerliers ou il coucha, assisté de Domingue, son homme de chambre, & autres les domestiques.

Le sieur de Rames aduerti, que ledit sieur de Fauols, estoit demeuré en la ville, & qu'il y coucheroit, augmente les menaces: redouble les blasphemés: telmoigne par ses discours estre plein de mauuais & pernitiex desseins: fait pointer tous les Canons du Chasteau sur la ville: & dit qu'il alloit faire vn acte, duquel on parleroit à iamais. Tout cela porte & incite les habitans a faire quelques petites & legeres barricades aux aduenues dudit Chasteau, pour essayer d'empescher les effects

des menaces susdites.

Le samedi treiziesme dudit mois d'Aoust, dès la pointe du iour, ledict Gonnet, Aduocat du Roy, se transporta par toutes les Eglises & Monasteres dudit Peronne, & supplia les chefs & superieurs de faire faire prieres publiques & solempnelles, afin qu'il pleut à Dieu que toutes choses se passassent a son honneur, au contentement de sa Maiesté & repos de ses subiects. Lesquelles prieres furent aussi tost faictes, & commenees par toutes lesdites Eglises & Monasteres.

Le mesme iour, sur les huit heures du matin, tous ceux de la vile disposez selon leur deuoir d'obeyr entierement aux commandemens de sa Maiesté, font prier lesdits sieurs de Rames, Tadei & Cuzac, chefs des gens de guerre, estans audict Chasteau, de vouloir tenir toutes choses en estat iusqu'au retour des depputez, a fin que par ce moyen rien ne se fit de part ou d'autre, qui peut desplaire a sadiete maiesté. Cela fut ainsi accordé, apres grandes importunitiez: mais nonobstant ledict accord, (& sans considerer les courtoisies, dont vsoient les habitans, enuoyans continuellement dans ledit Chasteau, toutes sortes de viures, & autres choses qui y estoient necessaires.] Les susnommez n'auroient laissé d'entreprendre d'heure en heure quelque chose de nouveau, pour la fortification dudit Chasteau.

C'est accord, quoy que mal entretenu [comme dict est] fut cause que ledit iour de samedi, le passa assez doucement, iusqu'au soir. Toutes-foi voyans lors les habitans qui estoient ausdits barricades, que les soldats du Chasteau, ne cessoient de les agacer & brocarder, s'efforçans de venir aux prises avec eux, ils commencerent à s'irriter, & offenser, & prendre resolution de ne plus rien endurer, dequoy ledit Gonnet aduerti, alla en diligence, accompagné de Maistre Gregoire Benoist, Lieutenant de courterobbe, Loys Huet, Controlleur des traittes foraines, Iean de Boulongne, Robert le Page, & autres habitans, aux lieux & endroits desdits barricades, ou il priatres instamment vn chacun de supporter l'insolence desdits soldats, qui ne respiroient que le butin & pillage de la ville: de vouloir considerer qu'on auoit a faire à gens qui n'auoient que perdre: que par la grace de Dieu, la force & le bon droit estoient du costé des habitans: qu'il failloit bien aduiser de ne perdre n'y l'vn ny l'autre: que plus lesdits habitans endureroient d'iniures, d'opprobres, & de menaces, de tant plus sa Maiesté auroit subiect de se contenter d'eux, & approuuer leurs actions: en vn mot dict qu'il se failloit bien garder de tirer sur lesdits soldats, qu'ils n'eussent au prealable commencé, offensé, & blessé aucuns desdicts habitans. Mathieu Grin, & Pierre le Brethon, qui commendoient aux princi-

paux endroits desdits barricades, promirent de le faire ainsi durant ceste nuit, Monsieur le Baron de Bernicules, assisté des sieurs du Vétguer, de Freuilles, la Fontaines Delraissins, de Sains, de Beaumartin, Capitaine du Puis, Gardinville, du Sart, & autres le vint courtoisement offrir aux habitans, les supplians de l'employer librement pour le service du Roy, & leur conseruation s'ils auoient besoin de son assistance. Dequoy ayant eu aduis, ledit Gonnet estant lors au corps de garde, qui estoit deuant la grande Eglise Collegiale Monsieur S. Foursy, pria ledit Vatin Capitaine, Maistre Anthoine Macheuré, & Anthoine Samier, qui estoient audit corps de garde, de prédre la peine, d'aller bien humblement remercier ledit sieur Baron, & toute la cōpagnie, de tāt de courtoisie, & bonne volōté, & luy représenter la resolution susdite de ne laisser entrer aucune persōne dans ladite ville, iusqu'au retour desdits deputez. Ce qui fut aussi tost fait par lesdits Vatin Macheuré, & Samier, & ainsi se retira ledit sieur Baron.

Le Dimanche 14. dudit mois, les Maire & Echeuins voyās qu'ils n'auoient aucunes nouvelles de leurs deputez, ils iugerent qu'ils estoient pris & retenus, & ainsi que la Maïesté n'auoit encore eu aduis de la confusion, & du trouble qui estoit en ladicte ville: pourquoy ils en deputerēt deux autres, scauoir Maistre Robert le Pere, & Simon l'Euelque Aduocats, qui partirent
aussi

aussi tost pour aller trouuer sadite maiesté, & l'informer pleinement de tout ce qui s'estoit fait & passé, depuis le partemēt des premiers deputez.

Ce meisme iour de Dimanche sur les deux heures de releuee, ledit sieur le Baron de Bernieules [chef du nom, & des armées de l'Illustre, & ancienne maison de Crequy] estât en son Chasteau de Clery, distant d'une demie lieue de Peronne, enuoya lettres ausdits Maire & Escheuins, par lesquelles il leur mandoit que monsieur de Longueuille venoit en grande diligence, pour en qualité de Gouverneur General de la Prouince, remedier aux desordres qu'il y auoit en leur ville. Surquoy assemblée Generale le fit, pour aduiler ce qui seroit à faire, si ledit sieur de Longueuille se presentoit.

Comme on estoit sur la resolution, & aux aduis on vint dire & asseurer que ledit sieur de Longueuille estoit à la porte, dict de S. Sauueur, avec quelques cétils hommes, chose qui empecha fort lesdits Maire & Escheuins, & tous ceux qui estoient en ladite asséeblee. Lesquels sur le chap, ne peurent prédre autre resolution, sinō que les portes de la ville demeurās fermées, maître Iea Foncher, Lieutenant Criminel, ledit Gonnet Aduocat du Roy, Robert Choquet ancien Maire, & Iea Dournel, Aduocat, iroiet par vn bateau, parler audit sieur de Longueuille, pour le supplier de ne trouuer mauuais, si on luy refusoit

l'entree de la ville, attendu la resolution susdite, de ne laisser entrer aucune persōne, iusqu'au retour des deputez: Ce qui fut incontinent faict, & dict par iceluy Fonchet, portant la parole.

Ledit sieur de Longueuille, ayāt humainemēt receu les quatre susnommez, fit sa responce fort hautemēt, afin comme il est croyable d'estre entendu d'un grād nombre d'habitans qui estoient sur les rempars, remōstrāt entr'autres choses, le tort qu'on luy faisoit, de luy refuser l'entree de ladiēte ville, estant cōme il est Gouverneur General de la Prouince, & estāt venu expressēmēt & en toute diligence, pour empescher qu'il ne se passast rien au preiudice du seruice de sa Maieſté, protestant au surplus de s'en plaindre, & faire chastier rigoureusement lesdits habitans, & particulierement les quatre susnommez, comme perturbateurs du repos public, & infracteurs de l'Edict de Pacification, verifiē par toutes les Cours souueraines.

Tout le peuple, ayāt entēdu ceste responce extrêmement presante, & estant fort intimidē du grand bruit que faisoient les gens de guerre dās ledit Chasteau, demonſtrant vouloir sortir pour rompre lesdites barricades, & venir empescher l'entree dudit sieur de Longueuille, prit les clefs de ladite porte S. Sauueur, qui auoient estē mises entre les mains dudit Maistre Claude Aubé, Esleu & Escheuin, demeurant fort proche d'i-

celle porte, afin de les auoir & tenir tousiours prestes, pour dōner entree aux habitāns du fauxbourg, dit de Bretagne, en cas que ceux de la ville fussēt attaquez & forcez par ceux dudit Chasteau, & eussent besoin de secours, & les mit entre les mains dudit Desmerliers Maieur, qui cōmenda à Fourfi Cornet, Doyen des Sergens de ladite ville, faire ouuerture de ladite porte audit sieur de Longueuille, qui ne cessa de parler aux quatre susnommez, iulqu'a tant qu'il vit ladicte porte ouuerte, & le pont abbaissé.

Cela faict, ledit sieur de Longueuille, entrant audit Peronne, fut receu par ledit Desmerliers, sieur de Remerangles, Lieutenant Particulier, Benoist, Lieutenant de Courte robe: par maistre Jacques de Morlé court, Ieā Bernier Esleuz, François de Pinehepré, Anthoine l'Empereur. François Aubé, Aduocat, Anthoine Machecré, Adriē du Croc, Abraham le Brethon, Claude de Poictou, Francois Vaillāt, Pierre l'Abbé Procureur, Estienne Canouelle, & Adriā Pieffort, par Gregoire de Lanchy, Claude Vaillant, Robert Vvasset, Nicolas de Paruillē, Charles le Feure, Ieā le Vasseur, gregoire de la Cocquerie, Pierre Tellier, Anthoine Marié, Claude le dieu, Fourfi Roussel, Fremin Hugot, Guillaume le febure, Claude le moisne, Vincēt Dotrée, Claude mauroy, Adriā le Febure, Fremin de la Cauchie, Gabriel Bourlon, Louys Hyuer, Christophle Cha-

Itelain, Ieā Francelles, Charles le Bon, Guislain Driencourt, Ancelme de Lannoy, Toussains le Clerc, pour si Liart, Philippes de Fresnes, Iacques de Lattre, André Iustice, Simeon Estenè, Hierolme Vvathon, Robert de Bray, Urbain de Bernauille, Pierre Billart, Medard Caton, Claude Merleu, Jacques Sohier, David le Feu, Iacques Perrin, Robert Croquesel, Iean de l'Eaue, avec vn nombre infini d'autres habitans.

Entrant donc ledit sieur de Longueuille, accompagné & suivi de tous les susnommez, dit & declara hautement par plusieurs & diuerses fois, qu'il n'estoit venu que pour le seruice de la Maieſté, pour la conseruation de la ville, sous son obeyſſance. & pour faire contenir vn chacū es termes de son deuoir. Cōmandant en outre, à tous les habitās de ne plus le recognoistre pour gouuerneur general de la Prouince, & de ne luy rendre aucune obeyſſance, si tost qu'ils s'apperceueroyent qu'il s'eſcarteroit, ou demétiroit tāt soit peu, du tres-humble seruice par luy deub à sadite Maieſté, de laquelle il desiroit estre, & demeurer toute sa vie, tres-obeyſſant, & tres-fidel subiect. Discours qui fut fort plausible & agreable à vn chacun.

En fin ledit sieur de Longueuille, arriué audit Peronne, & logé en l'hostel de Piennes, appartenant aux veuve, & heritiers de feu Monsieur le Cortoyer, viuant Lieutenant General, Civil

& Criminel, audiēt lieu, le reste de la iournée se passa fort doucemēt, encore bien que ceux du Chasteau, fissent plusieurs retranchemens, & mōstrassent eux preparer à quelque grād effort, continuans tousiours leurs menaces & parolles indiscretes. Et pendant tout cela, ledit sieur de Fauols estoit tousiours chez ledit Desmerliers, visité des plus honorable, & qualifiez habitans humainement traitté, & n'ayāt aucun iuste subiect de mescontentement.

Le lendemain quinziesme dudit mois. & iour de l'Assomption nōstre Dame, lediēt sieur de Longueuille desirāt sçauoir tout ce qui s'estoit passé, le commencement, le progrès, & la fin escouta, avec beaucoup de patience, ceux qu'il manda venir parler a luy. Enuoya visiter ledit sieur de Fauols par ledit sieur Baron de Bernieulles, par monsieur de Riberpré, Gouverneur de Corbye, & plusieurs autres Seigneurs & Gentils-hommes, & ayant eu aduis que la moitié des clefs des portes de ladiēte ville estoit encore, comme a l'ordinaire dans lediēt Chasteau, il commenda à Monsieur de Monceaux, d'aller sçauoir desdiēts sieurs de Rames, Tadei, & Cuzac, s'ils les luy vouloient enuoyer, & le recognoistre pour Gouverneur General de la Province. A quoy les susnommez n'auoient voulu respondre promptement : mais ayans

pris quelque temps pour aduiser entr'eux, ledit sieur Tadei apporta les clefs, & les bailla audict sieur de Monceaux, vsant de ces termes, tenez voila les clefs que demandés, vous direz a Monsieur de Longueuille que si nous eussions creu, qu'il eut deub entrer dans Peronne, comme il à faict que peu de temps parauant fussions sortis de ce Chasteau, & forcé les barricades des habitans, pour piller & s'accager toute la ville, & puis après mettre le feu en plusieurs endroits, en nous retirans audict Chasteau, & que nous auons à iamais regret de n'auoir ce faict.

Les clefs, & paroles susdicts rapportees audict sieur de Longueuille, il dit que ces menaces n'estoient plus de saison, & qu'elles ne pouuoient plus seruir, qu'à faire cognoistre par trop indiscrettement, comme ledict sieur de Conchines, & les siens desiroient à l'aduenir mal traicter lesdicts habitans, gens aimables : toutesfois vertueux & courageux, & qui ne crient, & publiēt par tout autre chose, sinon qu'ils ont tousiours esté & desirent demeurer à iamais, tres-humble & tres-fidels subiects de la Maiesté.

Le Mardi ensuiuant seizeiesme dudit mois, ledict sieur de Longueuille, s'estant curieusement & exactement informé de tous les comportements & actions, tant dudit sieur de Fauols, que de tous autres enuoyez audit Perōne, de la part dudit sieur de Conchines, admira la patience

mo destie & retenue des Peronnois, loua & approuua hautement tout ce qu'ils auoient faict, n'ayant à autres desseins, pris les armes que pour seruir sa maiesté conseruer la ville soubs son auctorité, & pour empescher les sinistres effects des menaces susdits.

Ledit iour sur le midy, voyant ledict sieur de Longueuille, que tous ceux qui estoient dans le Chasteau, s'esloignoient plustost qu'ils ne s'approchoient de leur deuoir, il fit sommer & semondre lesdits de Rames, & Cuzac, de sortir dudit Chasteau, & s'entrer en garnison dans la ville, avec leur compaignie: leur remonstrant la grande faute qu'ils auoient faict & commis, s'emparant dudit Chasteau, & quittant leur dite garnison. Desquelles sommations & remonstrances, ils auroient tenu fort peu de conte.

Toutesfois quelques heures apres ledit sieur de Longueuille ayant eu aduis, que plusieurs des soldats, estans dans ledict Chasteau, auoient pris goust aux remonstrances susdits, & desiroient le recognoistre, & luy rendre l'honneur obeyssance & respect deubz a sa qualité de Gouverneur general de la Prouince, il les en auroit aussi faict sommer par diuers Seigneurs & Gentils-hommes. Mais tous ces soldats furent pour ce coup formellement empeschez par lesdits de Rames, Tadei, & Cuzac, qui continuoient leurs discours & menaces contre les-

dicts habitans, disans librement a ceux qui parloient a eux, qu'ils estoient tous resolu de mourir & ruiner entieremēt ladite ville, plustost que de recognoistre le dit sieur de Longueuille.

Nonobstant ceste resolution temeraire, les trois susnommez voyans bien que leurs soldats parlans haut, comme ils faisoient, se rendoient maistres du Chasteau, & recognoistroient ledit sieur de Longueuille, font feinte d'vne plus grande assurance & resolution que iamais : font vn grand & continuel bruit toute la nuit : commandent aux soldats de tirer sur maistre Louys Marechal, Pierre Thuet, Louys Boistel, Anthoine Collat, Orset Brunel. Louys Cheminet Anthoine Corneau, François de Comont, & autres habitans, paroissans en ronde, & sentinelle es environs dudit Chasteau : bref tesmoignent en apparence n'auoir aucune crainte & apprehension, ny redouter l'autorité & puissance dudit sieur de Longueuille.

Le mercredi 17. dudit mois, tous ces soldats comēcent a considerer de rechef la faute par eux cōmise, quittāt leur garnison pour se retirer audit Chasteau, l'autorité & puissance dudit sieur de Longueuille, l'obeyssance qu'on luy deuoit rendre comme Gouverneur general de la Province : & tous ces cōsideratiōs, fōt resolutiō de sortir du chasteau, & le fōt, sçauoir tāt au sieur de Longueuille qu'ausdits de Rames, Tadei & Cuzac,

& Cuzac.

A mesme instant que ces soldats, eurent fait cognoistre leur intention, ledit sieur de Longueuille, pour leur donner plus de subiect de l'excuter promptemēt leur fit faire promesse de sa part, de payer à chacun d'eux, auant la sortie dudit Chasteau, la somme de quarāte huiēt liures, pour payement de quatre monstres qui leurs estoient deuës. Choses qui furent faictes & expediées ledit iour sur le midy.

Tous ces soldats ayans receu argent, & estant sortis dudit Chasteau, ledit sieur de Longueuille y fit entrer ledit sieur Baron de Bernieulles, pour en prendre la garde, attendant la volonté & resolution de sa Majesté. C'est vn Seigneur parfaictement aymé & chery au pays, à raison de sa grāde douceur, probité & rares vertus qui l'accompagnent.

Plusieurs desdits soldats qui auoient tousiours esté sous la charge dudit sieur de Fauols, estans hors dudit Chasteau, furent si impudens que de dire, auant ladicte ville, que l'escot n'estoit encore assis: qu'il y auoit encore vn coup à faire, qui se feroit bien tost, duquel on parleroit à iamais, & qu'ils brusleroiēt & ruineroiēt ladicte ville, tost ou tard.

Autres soldats plus sages & conscientieux, disoient par tout, que ce qui s'estoit fait estoit vn coup de Dieu, & que si cela ne fut ainsi arriué, qu'il auoit esté conclud qu'aussi tost que ledict sieur Cheualier de Conchines, seroit dedans ledit Chasteau avec sa troupe, on feroit vne sor-

tiela nuict, pour couper la gorge aux meilleurs & plus courageux habitans qu'on disoit estre en nombre de trente quatre au plus, entre lesquels Benoit, Vatin, Pinchepté, du Crocq, Tellier, Boulongne, le Page, Maistre Anthoine Vaillant, Nicolas Vvasser, Esleus, Romain, Renard, Procureur du Roy, en l'Eslection & magazin à sel dudit Peronne: Arthus Bouteuille, Grenetier, Hierosme Dournal, Controolleur audit magazin, Jean de Haussli Greffier de ladicte ville, Toussains Thoury, Adrien Begard, Foursi Postel: & pour faire la closture de ce Catalogue, ou desnombrement par gens de l'oguerobbe, Robert le Febure, sieur de Sormont, Conseiller du Roy, & Antoine Iournal Aduocat. Apres la mort & massacre desquels on deuoit executer toutes les menaces susdictes, & s'assurer totalemēt de ladicte ville, pour le seruice de Monsieur le Marechal, duquel seul on parloit, & non du seruice de sa Maieité.

Sur les trois à quatre heures du soir, du mesme iour dix-septiesme Aoust, Monsieur Mangot Secretaire d'État, se presenta à la porte du faulxbourg, dict de Soibotecluze, pour entrer en ladicte ville: mais d'autant que Monsieur de Longueuille auoit tres-estroitement defendu de ne laisser entrer, qui que ce fut, sans l'en aduertir: Maistre Nicolas d'Auzet, Capitaine dudit faulxbourg, David Bannier, Jean Pezé, Barthelemy de Leprée, Jean de Flaucourt, François de l'Espine, & plusieurs autres supplierent ledit sieur Mangot, de vouloir patienter quelque peu, & ayans eu aussi tost commandement dudit sieur de Lon-

gueuille, de le laisser entrer, ils l'auroient ainsi fait.

Et estant iceluy sieur Mangot entré audit Peronne, il bailla audit sieur de Longueuille, lettres closes, desquelles ilestoit porteur, par lesquelles sa Majesté commandoit d'oster les barricades susdits (chose qui auoit ja esté faicte dès le midy) & luy dit que chacun blasmoit & condamnoit tout ce qui s'estoit fait & passé audit Peronne, tant par luy que par les habitans. A quoy ledict sieur de Longueuille fit responce, que ceux qui prendroient le loisir de cognoistre la verité de tout ce qui s'estoit passé audit Peronne, ne le blasmeroient iamais, ne s'estant fait aucune chose contre le seruicede sa Majesté: ains seulemēt pour empescher les effets des cruels & perniciox desseings cy dessus representez, & pour reprimer l'audace & insolence desdits de Fauols, Rames & autres susnommez, & le mespris qu'ils auoient fait de luy & de sa qualité de Gouverneur general de la Prouince, contre l'expresse volonté & intention de sadicte Majesté, assez manifestée par le susdit Edict de Pacification. Au surplus qu'il s'asseuroit que sadicte Majesté, ne trouueroit mauuais tout ce qui s'estoit fait, son seruice n'y estant aucunement interressé, n'y le General de l'Estat, y allant seulement du particulier de luy & de Conchines, qui ne vouloit recognoistre en ladicte qualité de Gouverneur general: & qu'il esperoit que sadite Majesté ne se redroit partialle aux querelles particulieres, comme il l'auoit ja tres-humblemēt supplié de ne faire, par plusieurs de ses lettres.

L'arriuée dudit sieur Margot estant paruenü à la cognoissance des Maire & Escheuins, ils se-feroient aussi tost transportez en corps, au lieu ou il estoit logé pour le saluer & l'asseurer de leur tres-humble seruice, fidelité & obeïssance vers sa Majesté, & le supplier de vouloir croire, qu'ils auoient esté forcez, & violencez par les insoléces & menaces susdictes à faire ce qu'ils auoient fait; & que iamais ils ne s'esloigneroient du debuoir de tres-humbles, tres-obeïssans, & naturels subjects de sadiete Majesté pour quelque pretexte & occasion que ce peut estre.

Lesdits de Haussi, & le Vasseur deputez, reuindrent à Peronne avec ledit sieur Mangot, tres-malcontens du mauuais traictement par eux receu dudit sieur de Conchines, qui les eut infailliblement battu & outragé, cessant l'assistance & empeschement de Monsieur de Caumartin, les appellans mutins, temeraires & impudens pour auoir eu recours à sa Majesté, sans sa permission: leur disant qu'auant peu de iours il feroit cognoistre aux habitans de Peronne qu'il estoit leur maistre & superieur, & les empescheroit bien de faire aucune chose, contre sa volonté. Et passans lesdits Deputez par la ville de Roye, avec ledict sieur Mangot, Monsieur de Migneux, Gouverneur de Montrœil, s'efforça de les faire arrester, soustenant qu'ils estoient responsables & punissables pour tous les habitans de Peronne, qui auoient receu & recogneu ledit sieur de Longueuille: mais lesdits sieurs Cheualier de Conchines, de Plainville, & autres estans en ladiete

ville de Roye, ne le trouuerent bon, & furent d'auis de laisser librement passer lesdits Deputez avec ledit sieur Mangot.

Le Ieudy 18. dudit mois, ledit sieur Mangot partist de si grand matin, que personne ne le peut voir, & n'eurent les Maire & Escheuins le loisir de faire responce à la lettre, de laquelle il auoit pleu à sa Majesté les honorer. Dequoy ils ont eu & receu vn extresme regret & fascherie, de crainte d'estre blasmé de mespris ou negligence, & de dōner plus de prise sur eux, à ceux qui se plaisent à les trauerfer, tant qu'ils peuuent par mentonges, médifances & calomnies, les qualifians criminels de leze Majesté, pour auoir iustement empesché, que la ville de Peronne, fut mise au sac & au pillage par ceux mesmes, qui estoient obligez à sa conseruation.

Ledit iour 18. Aoust, ledit sieur de Fauols, Madame sa femme, & tous leurs domestiques, sortirent d'icelle ville, sur les six heures du soir, & allerent coucher en l'Abbaye de Biache, distante d'un demy quart de lieuë, où ils auroient séjourneé quelques iours.

Depuis ce iour, il ne s'est rien fait ny passé audit Peronne qui merite d'estre notté, Monsieur le Duc de Bouillon y est venu voir & visiter ledit sieur de Longueuille, cōme a fait du depuis Monsieur le Duc de Montbazon. On n'entend autre chose sur le marché dudit Peronne, & en toutes compagnies de Seigneurs, Gentils-hommes & habitans, sinon que chacun desire & entend seruir le Roy, sans vouloir rien entreprendre au pre-

judice de sa Majesté, chacun louë & approuue ce qui s'est passé audit Peronne, comme n'y allant aucunement de l'intereſt public: ains ſeulement du particulier deſdits ſieurs de Longueuille, & de Conchines, en vn mot, perſonne ne iuge cela ſuffiſant pour cauſer quelque trouble nouueau, & donner ſujet de reprendre les armes.

Tout ce que deſſus eſtant veritable, comme il eſt, quel ſujet de blaſmer & condamner les habitans de Peronne, ainſi que pluſieurs font? Ils ſont criminels de leze Majesté, pour auoir fait ce qu'ils ont fait. Ils ne deuoient auoir égard aux commandemens de Monsieur le Duc de Longueuille, quoy que Gouverneur General de la Prouince, ils deuoient ſatisfaire entierement aux volontez, & intentions dudit ſieur de Conchines, leur Gouverneur particulier. Ils deuoient ſouffrir & endurer toute ſorte d'affronts, d'indignitez, & d'opprobres, deſdits ſieurs de Fauols, de Rames, & de tous ceux de la garniſon. Bref ils ne deuoient recognoiſtre autre chef & ſuperieur, que ledit ſieur de Conchines.

Voila des diſcours de gens paſſionnez, ou penſionnez, ceux qui iugeront de ceſt affaire, ſans affection particuliere excuſeront touſiours leſdits habitans pour n'auoir fait aucune choſe contre le ſeruice du Roy.

L'on recognoiſſoit vn mal entendu, & mauuais meſnage entre le Gouverneur general, & le particulier. Le general deſſédoit de receuoir les garniſons nouuelles que le particulier vouloit enuoyer, ſans parentes de ſa M. & attache de luy ſur icel-

les. Le particulier vouloit empescher le general d'estre recogneu en sa qualité, nonobstant l'Edict de Pacification verifié par toutes les Cours souveraines. Que pouuoient faire autre chose en tel cas les plus sages, & prudens habitans que d'auoir recours à sadite Majesté pour entendre sa volonté sur tel differend?

Les habitans de Peronne l'ont ainsi fait. Ils ont député lesdits le Vasseur & de Haussi, le dixiesme dudit mois d'Aoust : & voyans qu'ils ne retournoient assez tost, ont encore député & ennoyé lesdits l'Euesque, & le pere. Le Dimanche ensuiuant, ils ont escrit de tous costez, & tenté toutes sortes de moyens, afin d'empescher qu'il ne se passast rien, qui peut prejudicier au service de sadite Majesté, attendant le retour desdits deputez. Ils ont fait de petites & legeres barricades, pour retarder les effects des menaces temeraires d'une insolente garnison, & ne s'en sont seruy à autre sujet : ils ont supporté patiemment mil injures, opprobres, & affronts, ils ont enduré tout ce qui se pouuoit pour ne venir aux prises avec ceux qui tesmoignoient auoir conjuré leur totale ruine: ils ont supplié le sieur de Fauols, de ne rentrer au Chasteau, & de demeurer avec eux dans la ville, non pour luy faire mal : mais seulement pour empescher l'exécution de ses menaces. Ils ont laissé entrer en ladite ville, ledit sieur de Longueuille : mais ç'a esté de crainte d'estre iustement blasmez, comme perturbateurs du repos public, & infracteurs dudit Edict de pacification. Bref ils se sont efforcez en toutes leurs actions de ne

s'esloigner de leur deuoir.

Voila pourquoy lesdits habitans de Peronne, esperent que Dieu protecteur de l'innocence, leur fera la grace, que le Roy bien & deuëment informé de tout ce qui s'est fait & passé audit Peronne, louëra & approuuera leurs actions, cōme choses faites pour son seruice, & conseruation de la dite ville de Peronne sous son obeïssance : & blasmera le procedé desdits sieurs de Fauols, de Rames, & de tous ceux de leur suite, pour s'estre par trop insolemment comportez à l'endroiçt despits habitans.

Le procès verbal dressé par les Maire & Escheuins dudit Peronne, dès le Samedy vingtiesme dudit mois d'Aoust, dudit an present mil six cens & seize, & l'Apologie, qu'on tient auoir esté nouuellement faicte & dressée pour les habitans dudit Peronne, ont fait obmettre, & passer sous silence, plusieurs choses dignes d'estre nottees, & remarquées pour la descharge & iustification desdits habitans, notamment mil & mil actions temeraïres & du tout insupportables desdits sieurs de Fauols, de Rames & plusieurs autres Gentilshommes voisins dudit Peronne, estans à la suite & aux gages dudit sieur de Cōchises. Que la brieueté ne soit donc icy blasmee, comme nuisible & preiudiciable, & qu'on se contente de ce petit discours, fait avec verité & en grand haste : Ce iourd'huy second iour de Septembre dudit an mil six cens & seize.

AVX PERONNOIS.

*Retribuet vobis Dominus, secundum iustitiam vestram,
& puritatem manuum vestrarum. Psal. 17.*